

प्रसार भारती  
प्रादेशिक समाचार एकांश  
आकाशवाणी रायपुर (छत्तीसगढ़)  
18.0 दिनांक 18.03.2018

लोक सुराज अभियान

लोक सुराज अभियान के चलत मुख्यमंत्री डॉक्टर रमन सिंह ह आज माओवाद परभावित कोंडागांव अउ नारायणपुर जिला के दउरा करीन।

ए दउरान मुख्यमंत्री ह कोंडागांव जिला के गांव पुसापाल म चौपाल लगाईन अउ सरकारी योजना के बारे म गंवई के मनखे मन ले गोठबात करीन। ए मउका म ओमन मंगल भवन बनाय बर पांच लाख रुपिया, ग्राम पंचायत मुख्यालय पुसापाल अउ आश्रित गांव कोटवेल म पांच-पांच लाख रुपिया तुरते मंजूर करे के घोसना करीन। संगे मुख्यमंत्री ह पन्द्रह झिन किसान मनके खेत ल बरोबर समतल करे बर मंजूरी दीन। गांव म डॉक्टर सिंह ह लइका मन ले उंखर पढ़ई अउ खेल के बारे म हालचाल पूछीन।

अइसने, मुख्यमंत्री ह आज नारायणपुर जिला के धौड़ाई गांव म राखे गे समाधान सिविर म सामिल होईन। सिविर म ओमन गांव वाले मनके समस्या सुनीन अउ मउकाच म ढाई करोड़ रुपिया के आने-आने बिकास काम के सौगात दीन। ए मउका म मुख्यमंत्री ह किहीन कि नारायणपुर ले ओरछा तक सड़क बनाय के काम तीन जून तक पूरा कर ले जाही।

मुख्यमंत्री-आधार

मुख्यमंत्री डॉक्टर रमन सिंह ह किहीन हे कि रासन कार्ड बवनाय बर फिलहाल आधार कार्ड जरूरी नइ हे। आने कोनों भी पहिचान पत्र ले रासन कार्ड बवनाय जा सकत हे।

डॉक्टर सिंह ह काली संझा राजनांदगांव म दू टिन जिला राजनांदगांव अउ कबीरधाम के अधिकारी मनके संघरा समीक्षा बइठका म बोलत ए बात किहीन। ओमन बइठका म राजस्व अधिकारी मन ल प्रदेशभर म पटवारी हल्का के स्तर म आवेदक मनके नामांतरण, बंटवारा अउ सीमांकन जइसन लंबित मामला मनके पूरा-पूरा निपटारा तय करे बर निरदेस दीन। समीक्षा बइठका म लोक निर्माण मंत्री राजेश मूणत, सांसद अभिषेक सिंह, संसदीय सचिव मोतीराम चंद्रवंशी अउ मुख्य सचिव अजय सिंह समेत बड़का अधिकारी मौजूद रिहीन।

## चैत्र-नवरात्र

मां सक्ति के आराधना के परब चैत्र नवरात्र आज ले सुरु होंगे। संगे भारतीय सनातन धर्म म नवा बछर घलो आज ले सुरु होवत हे। ए मउका म राजधानी रईपुर समेत प्रदेशभर म कई ठिन कारीकरम होवत हे।

नवरात्र के पहिली दिन आज रईपुर के मंदिर मन म भक्त मनके भीड़ लगे हे। नौ दिन तक ले रोजाना मां सक्ति के आने-आने रूप के पूजा-अर्जना करे जाही। उहें, मंदिर मन म आज सक्ति उपासना बर बिसेस मुहूर्त म मनोकामना जोत जलाय जाथे।

उहें, आज चेट्रीचंड महोत्सव घलो धूमधाम ले मनाय जावत हे। ए मउका म रईपुर समेत प्रदेशभर म कई ठिन कारीकरम होवत हे अउ भगवान झूलेलाल के भव्य सोभायात्रा निकाले जात हे।

ओति, जशपुर म आज चैत्र नवरात्र वर्ष प्रतिपदा के मउका म आदिवासी समाज डहार ले सरहुल परब मनाय जात हे। नगर के बांकीटोली के कटहल बगीजा ले हजार ले जादा आदिवासी मन पारंपरिक ओनहा कपड़ा म सजे-धजे ढोल अउ मांदर के थाप म नाचत-गावत सोभा यात्रा निकालीन। ए मउका म एक ठिन सभा घलो राखे गीस, जेमा अखिल भारतीय कल्याण आश्रम के राष्ट्रीय अध्यक्ष जगदेव राम, केन्द्रीय इस्पात खान राज्य मंत्री विष्णुदेव साय अउ राज्य के पूर्व मंत्री गणेशराम भगत ह संबोधित करीन।

## जकांछ-प्रत्याशी सूची

जनता कांग्रेस छत्तीसगढ़ के प्रमुख अजीत जोगी ह अवइया विधानसभा चुनाव राजनांदगांव ले लड़ही। आज राजधानी रईपुर म पार्टी डहार ले उम्मीदवार के नाव वाले तीसर सूची जारी करे गीस। जेमा श्री जोगी के संगे देवव्रत सिंह ल खैरागढ़, विधान मिश्रा ल धरसीवां, हरकिशन कुरे ल नवागढ़, योगेश तिवारी ल बेमेतरा अउ हृदय राम राठिया ल लैलूंगा ले उम्मीदवार बनाय गेहे।

## पदस्थापना

राज्य सरकार ह भारतीय वन सेवा के दू झिन अधिकारी मनके पोस्टिंग आदेस निकाल देहे। निकले आदेस मुताबिक कवर्धा के वन मंडलाधिकारी प्रभात मिश्रा ल नवा रईपुर के प्रधान मुख्य वन संरक्षक कार्यालय म उप वनसंरक्षक के पद म पोस्टिंग करे गेहे। उहें, उंखर जघा खैरागढ़ के वन मंडलाधिकारी दिलराज प्रभाकर ल कवर्धा वन मंडल के वन मंडलाधिकारी के उपरहा चार्ज दे गेहे।

## आरक्षक—मौत

दुरुग जिला के सुपेला थाना म पोस्टेड प्रधान आरक्षक के आज एएसआई बर पात्रता परीक्षा के दउरान दउड़े ले मउत हगे। मिले जानकारी मुताबिक बावन बछर के प्रधान आरक्षक घनश्याम पटेल बिहनिया एएसआई के प्रमोसन बर विभागीय परीक्षा म सामिल रिहीन। इही दउरान दउड़त हुरहा गिरे ले उंखर मउत हगे।

## हाईटेंशन तार—बच्चे झुलसे

राजधानी रईपुर के सड्डू इलाका म काली संझा मेंटनेंस बेरा हुरहा हाईटेंसन तार टूट के भूईया म गिरे ले उहां खेलत दू झिन नान्हे लइका झंझा गीन। तुतरे ओ लइका मन ल प्राईवेट अस्पताल म भरती कराय गेहे।

ऐति, घटना के खबर मिलतेच एडीएम रेणुका श्रीवास्तव ह अस्पताल पहुंच के लइका मनके हालत के जानकारी लीन अउ सुधर इलाज खातिर डॉक्टर मन ल निरदेस दीन। ओमन बतईन कि ए लइका मनके इलाज के पूरा खरचा विद्युत विभाग ह उठाही।

## बातों बातों में

सुनइया मन ल बतादन कि समसामयिक बिसय उपर आधारित हमर साप्ताहिक कारीकरम “बातों—बातों में” म ए बखत भू—संपदा विनियामक प्राधिकरण—रेरा उपर केन्द्रित रइही। रेरा ल रियल एस्टेट क्षेत्र म पारदर्सिता अउ दक्षता लाय के संगे बउरइया मनके हित ल बने राखे बर करे गेहे। ए बारे म रेरा के अध्यक्ष अउ राज्य के पूर्व मुख्य सचिव विवेक ढांड ह आकाशवाणी समाचार ले गोठबात करीन।

ए गोठबात के प्रसारण आज रतिहा साढ़े आठ बजे आकाशवाणी केन्द्र रईपुर ले होही। एला प्रदेस स्थित आकाशवाणी के जम्मों केन्द्र एके संघरा रिले करही।

\*\*\*\*\*